

REGLUGERÐ

219

15. nóv.

fyrir Vatnsveitu Svalbarðseyrar.

1. gr.

Vatnsveita Svalbarðseyrar er fyrirtæki, sem Svalbarðsstrandarhreppur er eigandi að og rekur í þeim tilgangi, að fullnægja vatnsþörf heimila og fyrirtækja á Svalbarðseyri og nágrenni, eftir því sem við verður komið og nánar er fram tekið í reglugerð þessari. Vatnsveitan skal rekin sem sjálfstætt fyrirtæki undir nafninu: Vatnsveita Svalbarðseyrar.

2. gr.

Vatnsveita Svalbarðseyrar hefur einkarétt til sölu vatns á veitusvæðinu.

3. gr.

Hreppsnefnd Svalbarðsstrandarhrepis hefur æðsta vald í málefnum veitunnar, en framkvæmdarstörf, er veituna varða, getur hún falið öðrum, og heimilt er henni að ráða sérstakan umsjónarmann fyrir vatnsveituna, er hafi eftirlit með veitukerfinu og annist önnur þau störf í þágu vatnsveitunnar, sem hreppsnefnd felur honum.

4. gr.

Enginn má leggja vatnsæðar frá aðalvatnsæð veitunnar, nema með leyfi hreppsnefndar og aðeins undir stjórn umsjónarmanns veitunnar eða annars, sem hreppsnefnd viðurkennir til þess.

Hverjum húseiganda ber að greiða allan kostnað við lagningu vatnsæða frá aðalæð í hús sín og annast viðhald þeirra. Gildir það jafnt um gamlar sem nýjar lagnir.

Skyllt er hverjum húseiganda að láta tafarlaust gera við vatnsæðar sínar, ef leki kemur að þeim.

Enginn má eyða vatni að óþörfu, né setja aflvélar í samband við vatnsveituna, nema leyfi hreppsnefndar komi til.

Óheimilt er að taka vatn úr brunahönum vatnsveitunnar.

5. gr.

Skyllt er þeim, sem nota vatn frá vatnsveitunni, að fara eftir fyrirmælum umsjónarmanns veitunnar um efni, lagningu og viðhald vatnsæða sinna, og annað það, sem lýtur að vatnslögnum í og við hús þeirra.

Heimilt er umsjónarmanni vatnsveitunnar að fara um hús og lóðir vatnsnotenda til að athuga vatnslagnir og gera þær ráðstafanir í þágu veitunnar, sem hann telur nauðsynlegar. Loka má fyrir vatn meðan hreinsun eða viðgerð fer fram á geymum eða æðum vatnsveitunnar, enda skal slíkt tilkynnt fyrir fram, ef þess er kostur.

6. gr.

Af öllum húseignum á vatnsveitusvæðinu, sem eru sérmetnar til fasteignamats og vatni er veitt í eða úr næst til vatnsæða, skal greiða vatnsskatt, sem nemur 2% af fasteignamatsverðinu árlega. Þó skal lágmark skattsins vera kr. 320.00 fyrir hvert hús. Auk þess skal greiða árlega fastagjald, kr. 150.00 af hverri húseign. Séu fleiri en ein íbúð í sömu húseign, greiðist árlega kr. 100.00 af hverri íbúð, sem fram yfir er.

- 219 Af húsum, sem að dómi hreppsnefndar nota vatn til annars en venjulegra heimilisþarfa, vegna atvinnureksturs, sem útheimtir mikið vatn, skal greiða skatt, sem ákveðinn verður með samningi við hlutaðeigendur.

7. gr.

Fyrir önnur vatnsnot skal greiða sem hér segir:

a.	Fyrir vatn í steypu, af hverri notaðri sementstunnu	kr.	0.50
b.	— þvott á bifreiðum, í hvert skipti	—	5.00
c.	— hvern nautgrip, sem inni stendur, árgjald	—	10.00
d.	— hvert hross, sem inni stendur, árgjald	—	5.00
e.	— vatnshana í fjárhúsi, ár hvert	—	20.00
f.	— hvern kjötskrokk í sláturhúsi	—	0.60
g.	— hvern slátraðan stórgrip í sláturhúsi	—	6.00
h.	— hverja tunnu kverkaðrar síldar eða matjessíldar	—	0.50
i.	— hverja tunnu sérverkaðrar síldar (haussskorinnar)	—	1.00
j.	— hverja tunnu flakaðrar síldar	—	2.00
k.	— hver 100 kg af söltuðum, ísuðum eða frystum fiski	—	0.40
l.	— hverja tunnu af söltuðum, flökuðum fiski	—	0.60
m.	— fiskþvott, hvert tonn	—	2.00
n.	— hverja tunnu af frystri síld (beitusíld)	—	1.50
o.	— hvert tonn af frystum ís	—	10.00

Fyrir vatn til skipa er gjald kr. 30.00 fyrir hverja smálest. Ef um vatnskaup í stórum stíl er að ræða, er hreppsnefnd heimilt að veita afslátt. Fyrir önnur vatnsnot, sem hér hafa verið nefnd, skal greiða eftir samkomulagi við hreppsnefnd.

8. gr.

Hreppsnefnd er heimilt að breyta vatnsgjöldum samkvæmt reglugerð þessari um allt að 50% til hækkunar eða lækkunar, bæði í heild og einstökum liðum, fyrir eitt ár í senn.

9. gr.

Gjalddagi á vatnsskatti skal vera 15. júlí og 15. október ár hvert, en af vatni til atvinnureksturs við lok hvers mánaðar. Greiðist vatnsskattur ekki á réttum gjalddaga, falla á hann dráttarvextir. Hreppsnefnd hefur á hendi reikningshald og innheimtu vatnsveitunnar.

Reikningsárið er almanaksárið og skulu reikningar vatnsveitunnar endurskoðaðir með reikningum hreppsins ár hvert.

10. gr.

Brot gegn reglugerð þessari varða sektum allt að kr. 1000.00, nema þyngri refsing liggji við að lögum.

Með mál út af brotum á reglugerð þessari skal farið sem almenn lögglumál.

Reglugerð þessi, sem hreppsnefnd Svalbarðsstrandarhrepps hefur samið og samþykkt og gerð er samkvæmt lögum nr. 15 20. júní 1923, staðfestist hér með til að öðlast þegar gildi, og birtist til eftirbreytni öllum þeim, sem hlut eiga að máli.

Félagsmálaráðuneytið, 15. nóvember 1952.

Steingrímur Steinþórsson.

Jónas Guðmundsson.